

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-9-Z/25  
**Kakanj,** 30.07.2025. godine

**Z A P I S N I K**  
**sa 9. redovne sjednice Općinskog vijeća održane 30.07.2025. godine (srijeda)**  
**u sali Općinskog vijeća sa početkom u 09:00 sati**  
**(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 9. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Hamza Vahid El-Din, Amel Kusić, Dženan Ajdinović, Tarik Hodžić, Mustafa Subašić, Edin Čatić, Ilhana Alajbegović, Sanda Hasagić-Terzić i Izudin Hrusto **(nakndno pristupio) (SDA)**

Mensur Čehajić, Sanel Šabanović i Adem Bećirhodžić **(SDP BiH)**

Adnan Demir, Mirnes Pipo i Mensur Bliznović **(NV)**

Dževdet Huskić **(nakndno pristupio)** i Branko Češljčić **(NS)**

Mirsad Tursum i Fahrudin Buza **(NiP)**

Nermana Mehić **(SN)**

Rešad Merdić **(nakndno pristupio) (S BiH)**

Armin Bašić **(DF)**

Slaven Katičić **(HDZ BiH)**

Mujo Fafulić **(nacionalne manjine)**

**Odsutni vijećnici:** Ilda Arnautović **(SDA)**, Edin Šljivo, Senad Softić, Vinka Aletović i Irna Imamović **(SDP BiH)** i Mirela Kubura **(SN)**

Predsjedavajući je konstatovao da je na sjednici u momentu prijave prisutno 22 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Mirnes Bajtarević**, općinski načelnik

**Emir Zaimović**, sekretar Općinskog vijeća

**Edin Aliefendić**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Mukades Delibašić**, pomoćnik općinskog načelnika za imovinskopravne, geodetske poslove i katastar nekretnina

**Nurudin Hrusto**, pomoćnik općinskog načelnika za civilnu zaštitu

**Mahir Sikira**, šef Stručne službe za poslove općinskog načelnika

**Izudin Puščul**, direktor Zavoda za planiranje i izgradnju

## Izviestioци, obrađivači, gosti

**Ishak Avdispahić**, direktor JP „Vodokom“ d.o.o. Kakanj

**Alem Škulj**, predsjednik NO i **Edin Bjelopoljak**, direktor Turističke zajednice Općine Kakanj

## Predstavnici medija

**NTV IC Kakanj**

**Radio Kakanj**

## Napomene o radu Kolegija Općinskog vijeća

Predsjedavajući je napomenuo da je u pripremi 9. redovne sjednice Općinskoga vijeća, Kolegij Općinskog vijeća dana 22.07.2025. godine, održao sjednicu na kojoj je usaglašen dnevni red sjednice. Također, po svim pristiglim predstavkama, prijedlozima i inicijativama Kolegij je zauzeo stavove i iste proslijedio nadležnim službama i organima na daljnje postupanje.

## Usvajanje zapisnika sa 8. redovne sjednice Općinskog vijeća

Nije bilo primjedbi na zapisnik i isti je usvojen jednoglasno sa 21 glasom ZA.

## Komentari na dostavljene odgovore na vijećnička pitanja

Nije bilo komentara na dostavljene odgovore na vijećnička pitanja.

## Komentari na dostavljena mišljenja na vijećničke inicijative

Nije bilo komentara na dostavljena mišljenja na vijećničke inicijative.

## Vijećnička pitanja

**Adnan Demir:** je postavio vijećničko pitanje koje konkretne mjere je poduzela Općina Kakanj, odnosno nadležne službe u vezi s alarmantnim zagađenjem zraka zabilježenim posljednjih mjeseci? Navodi, da prema dostupnim podacima u posljednja dva mjeseca građani općine Kakanj su izloženi alarmantnim vrijednostima zagađenja zraka, gdje indeks kvaliteta zraka (AQI) redovno prelazi vrijednost od 150, što se prema važećim zdravstvenim i ekološkim standardima klasificira kao „nezdrav“. S tim u vezi pita da li je Općina Kakanj u proteklom periodu zatražila inspekcijski nadzor nad radom najvećih zagađivača, prije svega TE Kakanj i TC Kakanj, u smislu provjere poštivanja okolišnih dozvola i relevantnih propisa, te da li postoje aktivnosti i saradnja s višim nivoima vlasti s ciljem identifikacije izvora zagađenja i hitnog provođenja mjera za zaštitu zdravlja stanovništva?

**Mensur Čehajić:** je postavio vijećničko pitanje da li je u planu postavljanje kontejnera za prikupljanje otpada tokom ljetne sezone na području Konđila u MZ Dubovo Brdo uz rijeku Ribnicu (kod autobusnog stajališta)?

## Vijećničke inicijative

**Mirnes Pipo:** je pokrenuo vijećničku inicijativu za imenovanje jedne ulice u Kakanju pod nazivom „Ulica žrtava genocida u Srebrenici“. Svjestan je da općina Kakanj na dostojanstven i primjeren način obilježava taj tragični događaj, između ostalog i kroz simboliku cvijeta Srebrenice u središtu kružnog toka kod Općinskog suda i Policijske stanice Kakanj. Ipak, s ciljem dodatnog jačanja kulture sjećanja, edukacije mladih generacija, te izražavanja trajnog poštovanja prema žrtvama genocida, smatra da bi imenovanje jedne ulice navedenim nazivom bio snažan simbolički iskorak.

**Hamza Vahid El-Din:** je pokrenuo dvije vijećničke inicijative. Prva je za sanaciju puknuća vodovodnih cijevi u MZ Varda. S obzirom da u MZ Varda postoji nekoliko puknuća vodovodnih cijevi iste je potrebno identificirati u saradnji sa predstavnicima MZ i hitno sanirati. Naime, neka od ovih puknuća se nalaze ispod saobraćajnice, te voda iz sistema teče asfaltnom površinom. Smatra da bi sanacijom trebalo obuhvatiti zamjenu dijela cijevi na lokacijama gdje su se puknuća već dešavala u prošlosti, te imaju potencijal da se ponove, a kako bi se izbjeglo kontinuirano rezanje i sanacija asfalta na saobraćajnici.

Druga inicijativa je za obilazak dvorišta OŠ „15. april“ u naselju Termoelektrana od strane policijskih službenika. U razgovoru sa mještanima naselja na tom području, te roditeljima čija djeca pohađaju istu školu, informisan je da se na području školskog dvorišta u večernjim satima okupljaju sumnjiva lica koja pritom na ovom području ostavljaju otpad kompromitirajućeg sadržaja, što predstavlja sigurnosni i zdravstveni rizik za djecu/đake.

**Mustafa Subašić:** je pokrenuo dvije vijećničke inicijative. Prva se odnosi na uređenje poligona u MZ Kučići koje je počelo prije nekoliko godina kada su izvršeni pripremni radovi i asfaltiranje terena. U nastavku radova neophodno je postavljanje zaštitne ograde sa donje i bočnih strana što je planirano da se uradi uz donaciju materijala iz Općine, a kojeg bi mještani samostalno pripremili i ugradili, ali je prije toga nužno što prije izvršiti sanaciju klizišta koje se nalazi odmah iznad poligona, te aktivno ugrožava teren nanosima materijala od zemlje i kamena. U tom pravcu predlaže izgradnju potpornog zida ili postavljanje betonskih gabiona kako bi se ugroženost svela na minimum, a djeci omogućilo korištenje igrališta u punom kapacitetu. Druga inicijativa je za uređenje potoka u MZ Tršće. Naime, kroz centralni dio MZ Tršće proteže se potok koji prolazi pored glavne ceste, neposredno pored džamije i školskog dvorišta u dužini od cca 200 metara. Potok se trenutno nalazi u zapuštenom i neuređenom stanju, osim na nekim dijelovima koje su mještani sami uspjeli urediti u okviru svojih mogućnosti. Obzirom da u mjesnoj zajednici nije riješen sistem kanalizacije u koritu potoka se može vidjeti i akumulacija otpadnih voda koja u ljetnom periodu i u periodu suša posebno dolazi do izražaja jer je tok vode usporen, pa količina otpadnih voda dominira u odnosu na oborinske vode, što uzrokuje pojavu jako neugodnih mirisa kao i potencijalne izvore zaraze za stanovništvo tog područja.

**Tarik Hodžić:** je pokrenuo dvije vijećničke inicijative. Prva je za rekonstrukciju vodovodne mreže od potputnjaka u naselju Termoelektrana do OŠ „15. april“ Kakanj. Dotrajale azbest-cementne cijevi u dužini cca 300 m potrebno je zamijeniti zbog potencijalnog rizika za zdravlje mještana u slučaju oštećenja ili urušavanja. Druga inicijativa je za postavljanje usporivača brzine (vibracijskih traka) na regionalnoj cesti R-445 na dionici Kakanj – Bilješevo kod raskrsnice za mjesne zajednice Sopotnica, Popržena Gora i Modrinje. Naime, u neposrednoj blizini predmetne lokacije se nalaze osnovna škola, ambulanta porodične medicine, park, prostorije mjesnih zajednica, bazen i dr., zbog čega je raskrsnica jako frekventna. Iako se prije raskrsnice nalazi znak ograničenja brzine 40 km/h istog se vozači najčešće ne pridržavaju što gotovo na mjesečnom nivou uzrokuje saobraćajne nezgode.

**Adnan Demir:** je pokrenuo vijećničku inicijativu za povećanje budžetskih sredstava za specijalizacije ljekara i pravovremen transfer istih prema JU „Dom zdravlja sa stacionarom“ Kakanj. Navodi da u JU „Dom zdravlja sa stacionarom“ Kakanj stanje specijalističkog kadra postaje ozbiljno zabrinjavajuće, jer specijalističke usluge trenutno pružaju doktori specijalisti od kojih je većina u penziji. Pored toga, Ustanova se oslanja i na specijaliste iz drugih zdravstvenih ustanova, čije su usluge ne samo finansijski zahtjevne, već i nesigurne, jer postoji stalna mogućnost otkazivanja njihovih dolazaka. Poseban problem predstavlja činjenica da je u prethodnim godinama veoma mali broj ljekara upućen na specijalizaciju, pri čemu treba imati na umu da jedna specijalizacija traje i do pet godina. U ovakvim okolnostima postavlja se ključno pitanje: ko će u narednim godinama pružati specijalističke usluge građanima Kakanja?

Predsjedavajući je konstatovao da su vijećnici: Mensur Čehajić i Ilhana Alajbegović podnijeli vijećničke inicijative bez govornice.

**Mensur Čehajić:** je pokrenuo dvije vijećničke inicijative. Prva se odnosi na nabavku kanti za otpad mještanima naselja u MZ Plandište od strane JP „Vodokom“ Kakanj i to u dijelovima mjesne zajednice gdje ne dolazi kamion za odvoz otpada. Navodi da pojedini mještani nemaju pristup redovnom odvozu otpada ispred svojih kuća, zbog čega su prisiljeni da otpad iznose u vrećama do glavne ceste kako bi se isti transportovao do deponije, međutim do dolaska kamiona otpad raznesu psi lugalice po naselju, te se stvara jako ružna slika. Druga inicijativa je za pravilno zatezanje kablova od kablovske televizije i rasvjetnih tijela na području MZ Plandište i to na lokaciji od džamije do ulice 9. maj. Navodi da su u navedenom dijelu naselja kablovi nepravilno razvučeni između drvenih stubova i u niskom su položaju zbog čega predstavljaju potencijalnu opasnost za prolaznike i vozila, te narušavaju izgled naselja.

**Ilhana Alajbegović:** je pokrenula vijećničku inicijativu za proglašenje Udruženja Centar za podršku Roma „Romalen“ udruženjem od posebnog značaja za Općinu Kakanj. Udruženje „Romalen“ je nevladino, neprofitabilno udruženje koje djeluje više od 20 godina na području općine Kakanj. Fokus Udruženja je na marginaliziranim skupinama društva: mladi, žene, socijalne kategorije. Tokom svog

djelovanja Udruženje je implementiralo brojne projekte i aktivnosti koje pružaju besplatne edukacije i radionice kako za djecu i mlade tako i roditelje, te generalno ljude u potrebi.

### **Utvrđivanje dnevnog reda**

Predsjedavajući je za 9. redovnu sjednicu predložio dnevni red po pozivu, a koji je usaglašen na sjednici Kolegija. Napomenuo je da je u međuvremenu pristigao jedan dodatni materijal „Prijedlog rješenja o preuzimanju nekretnine u korist Općine Kakanj“ i predložio da se isti uvrsti kao prva tačka dnevnog reda, a da se ostale tačke pomjere za jedno mjesto, te bi Vijeće raspravljalo o 9 tačaka dnevnog reda.

U diskusiji o dnevnom nije niko učestvovao, te je Vijeće usvojilo dnevni red sa 19 glasova ZA, bez glasova PROTIV i 5 glasova UZDRŽAN.

### **Usvojeni dnevni red**

1. Prijedlog rješenja o preuzimanju nekretnine u korist Općine Kakanj
2. Prijedlog odluke o izražavanju interesa Općine Kakanj za učešće u projektu „BiH SuTra- Podrška tranziciji regiona bogatih ugljem u BiH“
3. Prijedlog odluke o pristupanju Sporazumu gradonačelnika za klimu i energiju
4. Izvještaj o poslovanju sa Izvještajem vanjskog revizora JP „Vodokom“ d.o.o. Kakanj za poslovnu 2024. godinu
5. Davanje saglasnosti na Odluku o izmjenama i dopunama Odluke o kalkulaciji troškova transporta komunalnog otpada iz udaljenih mjesnih zajednica
6. Program rada Turističke zajednice Općine Kakanj za 2025. godinu
7. Izvještaj o radu Komisije za procjenu prometne vrijednosti nekretnina za period od 01.07.2024-01.07.2025. godine

### **1. Tačka**

#### **Prijedlog rješenja o preuzimanju nekretnine u korist Općine Kakanj**

**Predlagač:** Općinski načelnik

**Obradivač:** Služba za imovinskopravne, geodetske poslove i katastar nekretnina

**Izjestilac:** Alem Škulj, ispred Službe za imovinskopravne, geodetske poslove i katastar nekretnina

U diskusiji su učestvovali: Dževdet Huskić i Mirnes Pipo.

**Dževdet Huskić:** je rekao da preuzimanje nekretnine čime se pokušava osnažiti FK Rudar ne ulijeva nikakvu nadu da će popraviti status ovog kluba, a koja po zakonu nije nužna. Isto tako dodao je da je ovu problematiku trebalo proširiti javnom raspravom obzirom na značaj FK Rudar za cijelu zajednicu. Djeluje kao da su rješenja donešena ishitreno bez obzira na obrazloženja koja su ponuđena. Na kraju je dodao da neće podržati ovaj prijedlog, jer je mišljenja da se ovoj problematici trebalo posvetiti više i šire pažnje.

**Općinski načelnik:** se kratko osvrnuo na historijat nastanka kluba te, navodeći statutarne odredbe rekao da je klub pravno lice i da sva dugovanja odgovara svojom imovinom a da su sredstva kluba u državnoj svojini, sredstva kluba mogu biti u mješovitoj svojini s tim što vrijednost ulaganja drugih pravnih lica ne može preći 49% od vrijednosti sredstava u mješovitoj svojini. Organi kluba su Skupština, UO i NO. Skupština je najviši organ sa ukupno 35 članova i bira se iz redova igrača i stručnih lica, predstavnika društveno-političke zajednice, iz redova osnivača, sponzora i ostalih. UO broji 13 članova, predsjednika bira Skupština, a članove predsjednik UO. UO raspolaže imovinom kluba. Klub može prestati sa radom dobrovoljno, pripajanjem, razdvaja ili transformiše, raspušta ili prestaje sa radom kada to odluči Skupština ili kad se za to steknu zakonski uslovi. Odluku o tome donosi Skupština 2/3 kvalifikovanom većinom glasova članova Skupštine. Obzirom na staturane odredbe kluba jasno je da odluku o njegovom prestanku rada na bilo koji način donosi Skupština, a sva imovina prelazi u vlasništvo Općine Kakanj, osnivačima, dioničarima te drugim ulagačima koji imaju vlasništvo nad imovinom ili dijelom imovine kluba srazmjerno ulaganju, uz prethodno izmirenje svih obaveza. Napomenuo je da Općinsko vijeće 2001.godine dalo trajno pravo korištenja bez naknade u korist FK Rudar na zemljište, upravnu zgradu sa klupskim prostorijama, stadion i pomoćno igralište a zbog potencijalnih sredstava međunarodnih organizacija. Netačne su informacije da FK Rudar ima vlasništvo, on ima samo pravo na trajno korištenje, vlasnik je Općina Kakanj. Skupština je ovu odluku na svojoj posljednjoj sjednici donijela

radi sigurnosti rada i smanjenja troškova kluba. Nadležnost za raspolaganje imovinom ima UO, ali je UO htio sve učiniti transparentnijim pa je i Skupština razmatrala ovaj prijedlog. Cilj je da se zaštiti imovina Općine Kakanj a da se troškovi kluba umanje, s tim da FK Rudar zadržava ekskluzivno pravo korištenja. Isto tako, ukoliko bi se i pokušala povući neka sredstva za infrastrukturu kluba, zbog svog pravnog statusa i kadrovskog kapaciteta, niko se ni od domaćih a ni međunarodnih organizacija ne odlučuje na takvu vrstu saradnje. Dodao je da nisu tačni navodi koji govore o planovima općinskog načelnika da se FK Rudar proda a da se na tom zemljištu nešto gradi, obzirom na Urbanistički plan Općine kojim je taj prostor rezerviran za sport a samo zemljište nije pogodno za gradnju. Pozvao je vijećnike da prepoznaju dobru namjeru prijedloga i da podrže prijedlog.

**Dževdet Huskić (replika):** je rekao da se načelnik nije osvrnuo na njegov diskusiju jer je on govorio o tome kako se klub desetinama godina izvlači iz krze a da nijedno od ponuđenih rješenja nije klubu pomoglo te da su organi upravljanja u svim sportskim klubovima bez kapaciteta, a da je u svojoj diskusiji želio da se ova tema javno diskutuje. Dodao je da općinski načelnik prilikom govora stalno dijeli građane na one koji vole i ne vole FK Rudar a u suštini to nije tako, jer se tu radi o ponuđenom rješenju koje će neki podržati a neki neće iz već navedenih razloga.

**Mirnes Pipo:** se osvrnuo na Rješenje o utvrđivanju prava trajnog korištenja iz 2001. godine i rekao da je dato pravo na trajno korištenje zemljišta sve dok na njemu postoji zgrada sa klupskim prostorijama, stadion i pomoćno igralište, pa se postavlja pitanje da li je došlo do neke promjene da prestane pravo trajnog korištenja. Upitao je može li se u ovom prijedlogu uvrstiti i član kojim se zabranjuje promjena namjene nekretnina koje su navedene.

**Općinski načelnik (odgovor):** je rekao da je iznosio stav po pitanju navoda u javnosti a ne replika na diskusiju vijećnika Huskića. U vezi prijedloga vijećnika Pipe rekao je članom 6. prijedloga definisano da FK Rudar zadržava ekskluzivno pravo na nekretninama što će se definisati posebnim ugovorom. Namjena građevinskog zemljišta crpi se iz prostorno-planske dokumentacije Općine Kakanj a ona se ne može mijenjati bez odluke Općinskog vijeća.

Nakon diskusije Vijeće je usvojilo Rješenje o preuzimanju nekretnine u korist Općine Kakanj, sa 18 glasova ZA, 4 glasa PROTIV i 2 glasa UZDRŽAN.

## **2. Tačka**

### **Prijedlog odluke o izražavanju interesa Općine Kakanj za učešće u projektu „BiH SuTra – Podrška tranziciji regiona bogatih ugljem u BiH“**

**Predlagač:** Općinski načelnik

**Obrađivač:** Služba za privredu, urbanizam i zaštitu okoline

**Izjavitelj:** Mirnes Bajtarević, općinski načelnik

U diskusiji niko nije učestvovao i Vijeće je jednoglasno sa 23 glasa ZA usvojilo Odluku o izražavanju interesa Općine Kakanj za učešće u projektu „BiH SuTra – Podrška tranziciji regiona bogatih ugljem u BiH“.

## **3. Tačka**

### **Prijedlog odluke o pristupanju Sporazumu gradonačelnika za klimu i energiju**

**Predlagač:** Općinski načelnik

**Obrađivač:** Služba za privredu, urbanizam i zaštitu okoline

**Izjavitelj:** Mirnes Bajtarević, općinski načelnik

U diskusiji niko nije učestvovao i Vijeće je jednoglasno sa 23 glasa ZA usvojilo Odluku o pristupanju Sporazumu gradonačelnika za klimu i energiju.

## **4. Tačka**

### **Izveštaj o poslovanju sa Izveštajem vanjskog revizora JP „Vodokom“ d.o.o. Kakanj za poslovnu 2024. godinu**

**Predlagač:** Skupština JP „Vodokom“ d.o.o. Kakanj

**Obrađivač:** Skupština JP „Vodokom“ d.o.o. Kakanj

**Izjavitelj:** Ishak Avdispahić, direktor JP „Vodokom“ d.o.o. Kakanj

U diskusiji su učestvovali: Mirnes Pipo i Dževdet Huskić.

**Mirnes Pipo:** je rekao da se u dijelu Izvještaja koji govori o vodovodnom sistemu ne spominju abzestne cijevi, odnosno ne govori se o tome koliko je vodovoda tim cijevima obuhvaćeno i šta se poduzima da se one zamijene. Isto tako, u Izvještaju se govori o gubitku proizvedene vode u iznosu preko 50%, pa se postavlja pitanje da li u cijeni usluga koje plaćaju, građani namiruju i taj gubitak. Dodao je da se Izvještaju navodi bojazan od kontaminacije vode izvorišta Bukovica a uzrokovano radom rudnika Rupice Vareš ali se ne navode nikakve aktivnosti vezane za realizaciju Odluke o davanju saglasnosti za uspostavu zaštićenog područja Gornja Trstionica – Bukovica. Također, upitao je zašto se u Izvještaju nigdje ne spominje animalni otpad niti gdje on završi, te da se navodi da je deponija pod stalnim nadzorom općinskih i kantonalnih inspeksijskih službi bez informacije šta kažu ti inspeksijski nadzori. Na kraju je dodao da je gradska pijaca infrastrukturno zapuštena te da nije u skladu ni sa potrebama građana a ni ljudi koji tamo nude svoju robu i proizvode.

**Dževdet Huskić:** se složio sa konstatacijama vijećnika Pipe, naročito u dijelu oko gubitka vode koji onda građani plaćaju. U vezi deponije Bare rekao je da se one samo spominju ali ne i činjenice da nema okolinske dozvole, da nema razdvajanja otpada, da se ne koristi regionalna deponija. U vezi sa prihodom koji je prikazan u Izvještaju, rekao je da je neprirodno da se prihod ostvaruje sa ovakvim stanjem na terenu. Rekao je da, ipak, treba istaknuti i pozitivne strane poslovanja kao npr, da prošle godine, i pored visokih temperatura i suše, općina Kakanj nije imala redukcija vode te da je organiziran i realizovan odvoz otpada iz svih mjesnih zajednica na području općine Kakanj. Na kraju je dodao da bi u buduće trebalo napraviti plan modernizacije i rekonstrukcije vodovoda sa tačno određenim rokovima, da se zatvori deponija Bare i uspostavi sistem razdvajanja otpada, te da se transparentnije prikazuju troškovi. Izvještaji javnih preduzeća su više pregled izazova s kojima se susreće uprava, ali u njima se ne osvrće na one teme koje su životno važne građanima, pa je rekao da neće podržati ovaj Izvještaj.

Nakon diskusije Vijeće je usvojilo Zaključak o prihvatanju Izvještaja o poslovanju sa Izvještajem vanjskog revizora JP „Vodokom“ d.o.o. Kakanj za poslovnu 2024. godinu, sa 18 glasova ZA, 2 glasa PROTIV i 4 glasa UZDRŽAN.

## **5. Tačka**

### **Davanje saglasnosti na Odluku o izmjenama i dopunama Odluke o kalkulaciji troškova transporta komunalnog otpada iz udaljenih mjesnih zajednica**

**Predlagač:** Skupština JP „Vodokom“ d.o.o. Kakanj

**Obrađivač:** Skupština JP „Vodokom“ d.o.o. Kakanj

**Izjavitelj:** Ishak Avdispahić, direktor JP „Vodokom“ d.o.o. Kakanj

U diskusiji su učestvovali: Slaven Katičić i Mujo Fafulić.

**Slaven Katičić:** je predložio da se u MZ Vukanovići u ljetnjem periodu od 01.04 – 31.10. uvede sedmični odvoz smeća zbog stanovništva koje se u ovom periodu vraća sa posla u inostranstvu pa je i količina otpada veća.

**Mujo Fafulić:** je rekao da su povećanja cijena usluga ovog JP učinjena zbog porasta minimalne plate radnika te da je ovo drugi put da se po istom obrazloženju cijene povećavaju.

**Općinski načelnik:** je rekao da bi se sredstva za odvoz sedmičnog otpada operativno mogla osigurati iz tekuće budžetske rezerve ili Fonda za zaštitu okoliša u cilju sprečavanja nastanka divljih deponija, a da ne bi bilo funkcionalno to i formalno provoditi jer bi povlačilo za sobom i mijenjanje višerangiranih akata.

**Slaven Katičić:** je rekao da mu je prihvatljiv prijedlog općinskog načelnika uz napomenu da se za narednu godinu planira na način koji je prethodno izložio.

Nakon diskusije Vijeće je usvojilo Zaključak o davanju saglasnosti na Odluku o izmjenama i dopunama Odluke o kalkulaciji troškova transporta komunalnog otpada iz udaljenih mjesnih zajednica, sa 18 glasova ZA, 3 glasa PROTIV i 2 glasa UZDRŽAN.

## **6. Tačka**

### **Program rada Turističke zajednice Općine Kakanj za 2025. godinu**

**Predlagač:** NO Turističke zajednice Općine Kakanj

**Obrađivač:** NO Turističke zajednice Općine Kakanj

**Izjavitelj:** Alem Škulj, predsjednik NO Turističke zajednice Općine Kakanj

U diskusiji su učestvovali: Mirnes Pipo i Adnan Demir.

**Mirnes Pipo:** je predložio pauzu od 10' na kojoj bi se vijećnicima dostavio novi materijal sa ispravkama.

Usljedila je pauza od 10' na prijedlog kluba vijećnika Novo vrijeme.

**Adnan Demir:** je rekao da se iz Programa rada Turističke zajednice vidi samo da će se održavati sastanci sa Općinom, otvoriti informativni portal, adaptirati prostor za rad i raditi na društvenim mrežama. Klub vijećnika Novo vrijeme neće podržati ovaj Program jer je mišljenja da za ove aktivnosti nije potrebno ovoliko sredstava koliko je predloženo, te da se osnivanje Turističke zajednice trebalo desiti nakon što se prioriteta u poboljšanju kvaliteta života građana riješe.

Nakon diskusije Vijeće je usvojilo Program rada Turističke zajednice Općine Kakanj za 2025. godinu, sa 18 glasova ZA, 3 glasa PROTIV i 3 glasa UZDRŽAN.

## **7. Tačka**

### **Izveštaj o radu Komisije za procjenu prometne vrijednosti nekretnina za period 01.07.2024-01.07.2025. godine**

**Predlagač:** Komisija za procjenu prometne vrijednosti nekretnina

**Obrađivač:** Komisija za procjenu prometne vrijednosti nekretnina

**Izjavitelj:** Esmir Čobo, predsjednik Komisije

U diskusiji niko nije učestvovao i Vijeće je usvojilo Zaključak o prihvatanju Izveštaja o radu Komisije za procjenu prometne vrijednosti nekretnina za period 01.07.2024-01.07.2025. godine, sa 18 glasova ZA, bez glasova PROTIV i 6 glasova UZDRŽAN.

Predsjedavajući je zaključio rad 9. redovne sjednice Općinskog vijeća u 10:50 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
Emir Zaimović

**PREDSJEDAVAJUĆI  
OPĆINSKOG VIJEĆA**  
Slaven Katičić